

Provedbena pravila za mrežne usluge IPP FBiH objavljena u Službenim novinama FBiH

11.03.2026 11:30



FGU
Federalna uprava za geodetske i imovinsko-pravne poslove

U „Službenim novinama Federacije BiH“, broj 16/26 od 27. februara 2026. godine, objavljena su Provedbena pravila za mrežne usluge Infrastrukture prostornih podataka Federacije Bosne i Hercegovine. Njihovo donošenje predstavlja važan korak u daljnjem normativnom i tehničkom uređenju IPP FBiH, u skladu sa Zakonom o infrastrukturi prostornih podataka Federacije BiH („Službene novine Federacije BiH“, broj 55/21).

Ovim provedbenim pravilima utvrđuju se zahtjevi za uspostavljanje i održavanje mrežnih usluga predviđenih Zakonom, kao i obaveze u vezi s njihovom dostupnošću. Pravila obuhvataju usluge pronalaženja, pregleda, preuzimanja, transformacije i pozivanja, čime se preciznije definiše tehnički okvir za pristup i razmjenu prostornih podataka u Federaciji BiH.

Poseban značaj ima činjenica da dokument, uz klasične OGC web servise, prepoznaje i jednakovrijedne OGC API standarde kao savremen način implementacije mrežnih usluga. Tako su, između ostalog, OGC API Records prepoznati za usluge pronalaženja, OGC API Maps i Tiles za usluge pregleda, OGC API Features za usluge preuzimanja, a OGC API Processes za usluge pozivanja. Na ovaj način dodatno se otvara prostor za modernije, fleksibilnije i interoperabilnije tehničke pristupe u razvoju prostornih servisa.

Prilozi uz provedbena pravila detaljnije uređuju i pitanja kvaliteta mrežnih usluga, uključujući kriterije izvedbe, kapaciteta i dostupnosti, koji se primjenjuju i na OGC Web Services i na OGC API implementacije. Time se osigurava pouzdaniji i efikasniji pristup podacima, uz jasnije definisane tehničke zahtjeve za subjekte IPP FBiH odgovorne za uspostavljanje i održavanje ovih usluga.

Objavi provedbenih pravila prethodile su javne konsultacije pokrenute 23. oktobra 2025. godine, u skladu sa zaključkom Vijeća IPP FBiH donesenim na 48. sjednici. Izrada ovog podzakonskog akta razmatrana je i na 49. sjednici Vijeća, održanoj 22. decembra 2025. godine, kao i na 50. sjednici održanoj 17. februara 2026. godine. Ovaj kontinuitet aktivnosti potvrđuje sistematičan pristup razvoju regulatornog i tehničkog okvira IPP FBiH.

Provedbena pravila stupaju na snagu osmog dana od dana objavljivanja u „Službenim novinama Federacije BiH“.

 [Provedbena pravila za mrezne usluge IPP FBiH.pdf \(292.2 kB\)](#)